

全上古三代秦漢
三國六朝文

晉宋

第六函
第十冊

全晉文卷一百十八

烏程嚴可均校輯

桓彝

彝字茂倫譙國龍亢人漢五更榮之九世孫惠帝時爲州主簿
拜騎都尉元帝爲安東將軍版行遂道合尋辟丞相中兵屬及
卽位累遷中書郎尙書吏部郎明帝時拜散騎常侍封萬甯縣
男補宣城内史成帝初死蘇峻之亂追贈廷尉諡曰簡咸安中
改贈太常

上疏乞宣城郡

内外之任竝非所堪但弓墳柏在此郡欲暫結名義

晉書桓彝傳

桓溫

溫字元子彝子成帝時選尙南康長公主拜駙馬都尉襲爵萬
甯縣男除琅邪太守累遷輔國將軍徐州刺史穆帝初代庾翼

爲安西將軍都督荆司雍益梁寧六州軍事荆州刺史領護南蠻校尉假節鎮江陵已平蜀功進征西大將軍開府封臨賀郡公升平中改封南郡公哀帝初加侍中大司馬都督中外諸軍事假黃鉞又加揚州牧錄尚書事移鎮姑孰廢帝時兼領平北將軍徐兗二州刺史孝武初卒追贈丞相諡曰宣武有集四十卷要集二十卷

請追錄王濬後表

臣聞崇德賞功爲政之所先興滅繼絕百王之所務故德參時雍則奕世承祀功烈一代則永錫祚胤案故撫軍王濬歷職內外任兼文武料敵制勝明勇獨斷義存社稷之利不顧專輒之罪荷戈長驚席卷萬里僭號之吳面縛象魏令皇澤被于九州玄風洽于區外襄陽之封廢而莫續恩寵之號墜于近嗣遐邇酸懷臣竊悼之濬今有二孫年出六十室如懸磬餬口江濱四節蒸嘗菜羹不

給昔漢高定業求樂毅之嗣世祖旌賢建葛亮之肩夫效忠異代
立功異國尙通天下之善使不泯棄況濬建元勳于當年著嘉慶
于身後靈基託根于南垂皇祚中興于江左舊物克彰神器重耀
豈不由伊人之功力也哉誠宜加恩少垂矜憫追錄舊勳纂錫茅
土則聖朝之恩宣暢于上忠臣之志不墜于地矣

見齒錄安西將軍
桓溫鎮江陵表言

薦譙元彥表

永和三年

臣聞太朴既虧則高尚之標顯道喪時昏則忠貞之義彰故有洗
耳投淵已振玄邈之風亦有秉心矯迹已敦在三之節是故上代
之君莫不崇重斯軌所已篤俗訓民靜一流競伏惟大晉應符御
世運無常通時有屯蹇神州丘墟三方圯裂免置絕響于中林白
駒無聞于空谷斯有識之所悼心大雅之所歎息者也陛下聖德
嗣興方恢天緒臣昔奉役有事西土鯨鯢旣懸思宣大化訪諸故

老搜揚潛逸庶武羅于羿浞之墟想王蠋于亡齊之境竊聞巴西
譙秀植操貞固抱德肥遯揚清渭波于時皇極邁道消之會羣黎
蹈顛沛之艱中華有顧瞻之哀幽谷無遷喬之望凶命屢招姦威
仍逼身寄虎吻危同朝露而能抗節玉立誓不降辱杜門絕迹不
面僞庭進免龔勝亡身之禍退無辟方詭對之譏雖園綺之棲商
洛管寧之默遼海方之于秀殆無已過于今西土已爲美談夫旌
德禮賢化道之所先崇表殊節聖喆之上務方今六合未康豺豕
當路遺黎偷薄義聲弗聞益宜振起道義之徒已敦流遯之弊若
秀蒙蒲帛之徵足已鎮靜頽風軌訓羣俗幽遐仰流九服知化矣

蜀志譙周傳注引
晉陽秋又見文選

賀白兔表

永和十二年見
宋書符瑞志

臣聞至德通玄則禎祥降靈和所感則異物生今白兔見于春穀

縣皓質純素皦然殊觀

藝文類聚
九十五

表

高安成是孫權每征還遣上方諸軍餉賜處也權又常大積米穀于此已備須濡者也

平洛表薦謝尙

今中州旣平宜時綏定鎮西將軍豫州刺史尙神懷挺率少致人譽足已入贊百揆出蕃方司宜進據洛陽撫寧黎庶謂可本官都督司州諸軍事

世說賞譽篇注引溫集

表免武陵王晞

晞體自皇極故寵靈光世不能率由王度修己慎行而聚納輕剽苞藏亡命又息綜矜忍虐加于人袁真叛逆事相連染頃日猜懼將成亂階請免晞官已王歸藩免其世子綜官解子璿散騎常侍

晉書武陵王晞傳

上疏自陳

臣近親率所統欲北埽趙魏軍次武昌獲撫軍大將軍會稽王昱
書說風塵紛紜妄生疑惑辭旨危急憂及社稷省之惋愕不解所
由彤影相顧隕越無地臣已闇蔽忝荷重任雖才非其人職在靜
亂寇讎不滅國恥未雪幸因開泰之期遇可乘之會匹夫有志猶
懷憤慨臣亦何心坐觀其弊故荷戈驅馳不遑寧處前後表陳于
今歷年矣丹誠坦然公私所察有何纖介容此嫌忌豈醜正之徒
心懷怵惕操弄虚說曰惑朝聽昔樂毅竭誠垂涕流奔霍光盡忠
上言告變讒說殄行姦邪亂德乃歷代之常患存亡之所由也今
主上富于陽秋陛下曰聖淑臨朝恭已委任責成羣下方寄會通
于羣才布德信于遐荒況臣世蒙殊恩服事三朝身非羈旅之賓
跡無韓彭之釁而反閒起于胷心交亂過于四國此古賢所已歎
息于既往而臣亦大懼于當年也今寇賊冰消大事垂定晉之遺
黎鵠立南望赴義之眾慷慨卽路元凶之命懸在漏刻而橫議妄

生成此貝錦使垂滅之賊復獲蘇息所已痛心絕氣悲慨彌深臣雖所存者公所務者國然外難未弭而內弊交興則臣本心陳力之志也

晉書桓溫傳

上疏廢殷浩

案中軍將軍浩過蒙朝恩叨竊非據寵靈超卓再司京輦不能恭愼所任恪居職次而侵官離局高下在心前司徒臣謨執義履素位居台輔師傅先帝朝之元老年登七十已禮請退雖臨軒固辭不順恩旨適足已明遜讓之風弘優賢之禮而浩虛生狡說疑誤朝聽獄之有司將致大辟自竊胡天亡羣凶殄滅而百姓塗炭企遲拯接浩受專征之重無雪恥之志坐自封植妄生風塵遂使寇讎稽誅姦逆竝起華夏鼎沸黎元殄悴浩懼罪將及不容于朝外聲進討內求苟免出次壽陽頓甲彌年傾天府之資竭五州之力收合無賴已自疆衛爵命無章猜害罔顧故范豐之屬反叛于芍

陂奇德龍會作變于肘腋羌帥姚襄率眾歸化遣其母弟入質京
邑浩不能撫而用之陰圖殺害再遣刺客爲襄所覺襄遂惶懼用
致逆命生長亂階自浩始也復不能曰時埽滅縱放小豎鼓行毒
害身狼狽于山桑軍破碎于梁國舟車焚燒輜重覆沒三軍積實
反曰資寇精甲利器更爲賊用神怒人怨眾之所棄傾危之憂將
及社稷臣所曰忘寢屏營啟處無地夫率正顯義所曰致訓明罰
敕法所曰齊眾伏願陛下上追唐堯放命之刑下鑒春秋無君之
典若聖上含弘未忍誅殛且宜遐棄擯之荒裔雖未足曰塞山海
之責粗可曰宣誠于將來矣

晉書殷浩傳

請還都洛陽疏

巴蜀旣平逆胡消滅時來之會旣至休泰之慶顯著而人事乖違
屢喪王略復使二賊雙起海內崩裂河洛蕭條山陵危逼所曰遐
邇悲惶痛心于旣往者也伏惟陛下稟乾坤自然之姿擬義皇立

朗之德鳳棲外藩龍飛皇極時務陵替備徹天聽人之情僞盡知
之矣是呂九域宅心幽遐企踵思貯雲羅混網四裔誠宜遠圖廟
算大存經略光復舊京疆理華夏使惠風陽澤洽被八表霜威寒
飈陵振無外豈不允應靈休天人齊契今江河悠闊風馬殊邈故
向義之徒覆亡相尋而建節之士猶繼踵無悔況辰極既迴眾星
斯仰本源既運支派自遷則晉之餘黎欣皇德之攸憑羣凶妖逆
知滅亡之無日騁思順之心鼓雷霆之勢則二豎之命不誅而自
絕矣故員通貴于無滯明哲尚于應機矧如石焉所呂成務若乃
海運既徙而鵬翼不舉永結根于南垂廢神州于龍漠令五尺之
童掩口而歎息夫先王經始立聖宅心畫爲九州制爲九服貴中
區而內諸夏誠呂晷度自中霜露惟均冠冕萬國朝宗四海故也
自彊胡陵暴中華蕩覆狼狽失據權幸楊越蠖屈呂待龍申之會
潛蟠呂俟風雲之期蓋屯圯所鍾非理勝而然也而喪亂緬邈五

十餘載先舊徂沒後來童幼班荆輟音積習成俗遂望絕于本邦
宴安于所託眷言悼之不覺悲歎臣雖庸劣才不周務然攝官承
乏屬當重任願竭筋骨宣力先鋒翦除荆棘驅諸豺狼自永嘉之
亂播流江表者請一切北徙呂實河南資其舊業反其土宇勤農
桑之務盡三時之利導之呂義齊之呂禮使文武兼宣信順交暘
井邑既脩綱維粗舉然後陛下建三辰之章振旂旗之旌冕旒錫
鑾朝服濟江則宇宙之內誰不幸甚夫人情昧安難與圖始非常
之事眾人所疑伏願陛下決立照之明斷常均之外責臣呂興復
之效委臣呂終濟之功此事既就此功既成則陛下盛勳比隆前
代周宣之詠復興當年如其不效臣之罪也褰裳赴鑊其甘如薺

晉書
桓溫傳

上疏陳便宜七事

其一朋黨雷同私議沸騰宜抑杜浮競使莫能植其二今天下分

崩喪亂殄瘁雖道隆中興而戶口彫寡近方漢時不當一郡之民
民戶既少則勢不多而當必同古制百官備職寔非大義隨時之
宜且設官已理務務寡則官省官省已國治則職顯而人清故光
武初興多所併省諸葛亮相蜀簡才併官此皆達治之成規今日
之所先也宜從權制併官省職令久于其事愚謂門下三省祕書
著作通可減半古已九卿綜事不專尙書故重九棘也今事歸內
臺則九卿爲虛設之位唯太常廷尉職不可闕其諸員外散官及
軍府參佐職無所掌者皆併于尙書若車駕郊廟藉田之屬凡諸
大事于禮宜置者臨事權兼事訖則罷職既併則官少而才精職
理則無害民而治道康矣

案其二已下晉書僅載四語云今戶口彫寡不當漢之一郡宜并官省職令久

于其事今據御覽補錄

其三機務不可停廢常行文案宜爲限日其四宜明

長幼之禮獎忠公之吏其五褒貶賞罰宜允其實其六宜述遵前
典敦明學業其七宜選建史官呂成晉書

晉書桓溫傳又御覽二百三引桓溫集略表

辭參朝政疏

方攘除羣凶埽平禍亂當竭天下智力與眾共濟之而朝議咸疑
聖詔彌固事異本圖豈敢執遂至于入參朝政非所敢聞臣違離
宮省二十餘載鞞韡戎務役勤思苦若得解帶逍遙鳴玉闕廷參
贊無爲之契豫聞曲成之化雖實不敏豈不是願但顧臣江漢艱
難不同曩日而益梁新平寧州始服懸兵漢川戍禦彌廣加彊蠻
盤耳勢處上流江湖悠遠當制命侯伯自非望實重威無臣鎮御
退外臣知捨此之艱危敢背之而無怨願奮臂投身造事中原者
實恥帝道皇居久陋于東南痛神華桑梓遂埋于戎狄若憑宗廟
之靈則雲徹席卷呼吸蕩清如當假息游魂則臣據河洛親臨二
寇廣宣皇靈襟帶秦趙遠不五載大事必定今臣昱臣親賢贊國
光輔二世卽無煩臣疏鈍竝閒機務且不有行者誰扞牧圉表
裏相濟實深實重伏願陛下察臣所陳兼訪內外乞時還屯撫寧

方隅

晉書桓溫傳

帝不豫上疏

聖體不和已經積日愚心惶恐無所寄情夫盛衰常理過備無害故漢高枕疾呂后問相孝武不豫霍光啓嗣嗚噓已問身後蓋所存者大也今皇子幼稚而朝賢時譽惟謝安王坦之才識智能皆簡在聖鑒內輔幼君外禦彊寇實羣情之大懼然理盡于此陛下便宜崇授使羣下知所寄而安等奉命陳力公私爲宜至于臣溫位兼將相加陛下垂布衣之顧但朽邁疾病懼不支久無所復堪

託已後事

晉書桓溫傳

檄胡文

胡賊石勒暴肆華夏齊民塗炭前因讎孽至使六合殊風九鼎乖越每惟國難不遑啟處撫劍北顧慨歎盈懷寡人不德

文選上遲與陳伯之

書注引晉中興書作幕府不木

忝荷戎重師次安陸經營舊邑瞻望華夏暫成楚

越登丘悽覽征夫憤慨昔叔孫絕粒義不同惡糞生守節恥存莽
朝麻紀逋僭一朝蕩定拯撫黎民卽安本土訓之曰德禮潤之曰
立澤信感荒外武揚八極先順者獲賞後伏者前誅德刑旣明隨
才攸序此之風範想所聞也

藝文類聚
五十八

與撫軍牋

此胡肆逆四十餘載傾覆社稷毀辱陵廟遇其可亡之會實是君
子竭誠小人盡力之日也江東雖爲未豐方之古人復爲未儉少
康曰一旅之眾興復祖宗光武奮發中興漢室況目大晉之祚樹
德長久兼百越沃野之資據江漢山海之利鹽鐵寶帛之饒角竿
羽毛之用收英賢之略盡兵民之力賊之強也猶復遵養時晦及
其斃也不齊力掃滅則大賊何由而自平大恥焉得而自雪臨紙
惆悵慨歎盈懷

藝文類聚
五十九

與慕容皝書

大四百八十九
小四十六字

自滄流曰北幽朔曰東將軍皆曰羈落而總率之矣首尾脣齒左

右力用鳴鏑揚鑣動數十萬

御覽三百五十八

荅慕容皝書

承將軍奮厲戎武激揚士卒鼓角長鳴摧折姦宄

十六國春秋二十四

與弟冲書

遺詔使吾依武侯王公故事耳王謝處大事之際日憤憤少懷

晉書

桓溫傳

書

大事之日僕在都謂無所復見慰勞又計時事也逐節郎來已具

言意餘所慰勞諸相具荅邊將粗當爾耳僕無所使酒席意

涪化閣帖

二

桓豁

豁字朗子彝第三子簡文輔政曰爲撫軍從事中郎除吏部郎

全晉文卷一百十八
呂疾辭遷黃門郎未拜桓溫曰爲都督沔中七郡軍事建威將軍新野義城二郡太守進右將軍尋監荆揚雍州軍事領護南蠻校尉荊州刺史假節又監益軍事溫卒遷征西將軍進督交廣并前五州軍事太元初遷征西大將軍開府卒贈司空諡曰敬

讓征西大將軍開府疏

臣聞三台麗天辰極呂之增耀論道作弼王猷呂之時邕必將仰參神契對揚成務弘易簡呂翼化暢玄風于宗極故宜明揚仄陋登庸賢雋使版築有沖天之舉渭濱無垂竿之逸用乃功濟蒼生道光千載是呂德非時望成典所不虛授功微賞厚賢達不呂擬心臣實凡人量無遠致階藉門寵遂叨非據進不能闡揚皇風贊明其政道退不能宣力所莅混一華戎尸素積載庸績莫紀是呂敢冒成命歸陳丹款伏願陛下迴神立覽追收謬眷則具瞻革望